

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी हों आखेया ऐ जे आप्रेशन सिंदूर नै भारत दी ताकत ते अपने थेहारबंदबलें दी दलेरी गी नमें सिरेया स्थापत कीता ऐ। उनें आप्रेशन सिंदूर दौरान 75 जहार कोला मते एन.सी.सी.एं दी अपनी इच्छेया कन्नै दिती गेदियें सेवाएं दी सराहना कीती।
2. केन्द्री खजाना मंत्री निर्मला सीतारमण होर अज्ज 2025-26 बरे दा आर्थिक सर्वेक्षण पेश करगंन। 2026-27 बरे लेई केन्द्री बजट ओंदे ऐतवारें पेश कीता जाहग।
3. 77में गणतंत्र दिवस समारोह दे समापन दे उपलक्ष च बीटिंग-रिट्रिट समारोह अज्ज नमीं दिल्ली दे विजय चौक च लग्गोग।
4. महाराष्ट्र दे उपमुख्यमंत्री ते एन.सी.पी. अध्यक्ष अजीत पवार हुंदा खीरी संस्कार बारामती दे विद्या प्रतिष्ठान मैदान च कीता जाहग।
5. चुना आयोग नै पच्छिम बंगाल च SIR कन्नै जुड़े दे अफसरें दे तबादले पर सख्त रौंस अपनांदे होई राज्य सरकार गी इनें तबादलें दा हुकम वापस लैने दा निर्देश दिता ऐ।
6. भारत ते न्यूजीलैंड बश्कार मजूदा टी-20 श्रृंखला दे चौथे मैच च मेहमान टीम नै श्रृंखला दी पैहली जित दर्ज कराई।

PM- NCC Rally

प्रधानमंत्री नरेन्द्र मोदी हों आखेया ऐ जे आप्रेशन सिंदूर नै भारत दी ताकत ते अपने थेहारबंद बलें दी दलेरी गी नमें सिरेया स्थापत कीता ऐ ते मुल्खै अंदर त्यार कीते गेदे थेहारें दी छमता ते प्रगति दा शानदार प्रदर्शन करी दस्सेया ऐ। कल नमीं दिल्ली च “एन.सी.सी. पी.एम रैली” गी सम्बोधित करदे होई उनें आखेया जे अज्जै- कल्लै दियें जंगें च लड़ाई छड़ी देशें दे बन्ने- टैंकें ते तोफें दे इस्तमाल तगर गै सीमित नेंई ऐ-सगुआं एहदे च साइबर ते सूचना युद्ध दी पछोकड़ै च कोड ते क्लाउड च बी लड़ी जा करदी ऐ। करियप्पा परेड ग्राउंड च आयोजित इस कार्यक्रम दे दौरान एन.सी.सी. आसेया आप्रेशन सिंदूर बारे पेश विशेष झांकी दा जिक्र करदे होई प्रधानमंत्री हों आखेया जे राश्ट्रीय सुरक्षा लेई एन.सी.सी. कैडटें आसेया कीते गेदे जतनें दी जिन्नी सिफत कीती जा घट्ट ऐ। इस अभियान दौरान मुल्ख भरै च 75 जहार कोला मते एन.सी.सी. कैडटें अपनी इच्छेया कन्नै नागरिक सुरक्षा- अस्पताल प्रबंधन- आपदा राहत ते समुदायिक सेवाएं च सराहने जोग योगदान दिता हा।



PM- Economic Survey

केन्द्री खजाना मंत्री निर्मला सीतारण हों अज्ज संसद च 2025-26 बरे दा आर्थिक सर्वेक्षण पेश करगंन। मुख् आर्थिक सलाहकार हुंदे मार्ग-दर्शन च खजाना मंत्रालय दे आर्थिक कम्में सरबंधि मैहकमे नै इस सर्वेक्षण गी त्यार कीते दा ऐ। आर्थिक सर्वेक्षण देश दी मजूदा आर्थिक स्थिति ते भविक्ख दे

नजरिए दी इक व्यापक समीक्षा हुंदी ऐ- जिसी ध्यानै च रखदे होई भविक्ख दिये
नीतिये ते बजट तयार करने च प्रमुख नुखते गी ध्यानै च रखेया जंदा ऐ।
2026-27 बरे लेई केन्द्री बजट औंदे ऐतवारें पैहली फरवरी गी पेश कीता जाहग।
संसद दे बजट इजलास दा पैहला गेड़ 13 फरवरी तगर चलोग ते अगला 9 मार्च
कोला 12 अप्रैल तोड़ी। बजट इजलास दौरान संसद दियां कुल 30 बैठकां होगन।



Beating Retreat

77में गणतंत्र दिवस समारोह दे समापन दे उपलक्ष च “बीटिंग-रिट्रीट” समारोह
अज्ज नमीं दिल्ली दे विजय चौक च लगगोग। इस समारोह च राष्ट्रपति द्रौपदी
मुरमू- उपराष्ट्रपति सी.पी. राधा कृष्णन- प्रधानमंत्री नरेन्द्र मोदी ते केन्द्री
मंत्रीमंडल दे सदस्य बी मजूद रौहगन। समारोह च भारती फौज- नौ सेना-
वायुसेना ते केन्द्री थेहारबंद बले दे बैंड अपनियां प्रस्तुतियां पेश करगन। इस बरे
विजय चौक च बैठने आहली थाहरें दे नां भारती संगीत वाद्ययंत्रें दे नां पर
रक्खे गेदे न- जेहड़ा स्हाड़ी सगोसार सांस्कृतिक विरासत दा प्रतीक ऐ।



R-Day Results

गणतंत्र दिवस परेड 2026 दे बेहतरीन मार्च-पास्ट दल ते बेहतरीन झांकिये दे
नतीजे दी घोषणा करी दिती गई ऐ। त्रौने सेनाएं च ऐकती भारतीय नौसेना गी
बेहतरीन मार्चिंग दल घोषत कीता गया ऐ- जिसलै कि केन्द्री थेहारबंद बले ते
होरनें सहायक बले च एह पुरस्कार दिल्ली पुलस नै जितेया ऐ। राज्यें ते केन्द्र

शासित प्रदेशों की श्रेणी च महाराष्ट्र नै अपनी झांकी गणेशोत्सव आत्मनिर्भरता दा प्रतीक लेई पैहली थाहर हासल कीती ऐ- जिसलै जे जम्मू-कश्मीर की झांकी दुए ते केरल की झांकी गी त्रीऽ थाहर हासल होई ऐ।



Ajit Pawar –Last Rites

महाराष्ट्र दे उपमुख्यमंत्री ते राष्ट्रवादी कांग्रेस पार्टी एन.सी.पी. दे प्रमुख अजीत पवार हुंदा खीरी संस्कार अज्ज बड्डलै 11 बजे बारामती दे विद्या प्रतिष्ठान मैदान च पूरे राजकीय सम्मान कन्नै कीता जाहग। केन्द्री गृह मंत्री अमित शाह होर उन्दे नडोए च शामिल होने लेई अज्ज बारामती जागंन। महाराष्ट्र दे मुख्यमंत्री देवेन्द्र फडनवीस ते राज्यमंत्री मंडल दे मिम्बर बी उन्दे खीरी संस्कार मौके उत्थे मजूद रौहगंन। महाराष्ट्र सरकार नै अजीत पवार हुंदी मौती पर त्रंऊ दिनें दे सरकारी सोग की घोषणा कीती दी ऐ ते अज्ज उन्दे खीरी संस्कार दे मौके आम छुट्टी दा ऐलान कीता गेदा ऐ। जियां जे पैहले बी खबर दिती जाई चुकी दी ऐ जे जंदे रोज हुंदे जहाज दे हादसे दा शकार होई जाने कारण उन्दी मौत होई गई ही।



EC –West Bengal

चुना आयोग नै पच्छिम बंगाल च मतदाता सूचिये की नमें सिरेया नजरसानी की प्रक्रिया एस.आई.आर कन्नै जुड़े दे अफसरें दे तबादले पर सख्त रौंऽ अपनांदे होई राज्य सरकार आसेया इ.आर.ओ दे रुपै च नियुक्त त्रंऊ आइ.ए.एस अफसरें

दे तबादले दे हुकम गी वापस लैने लेई आखेया ऐ। इस बारे निर्देश जारी करदे होई आयोग नै आखेया ऐ जे एह तबादले ओहदी सैहमती दे बिजन कीते गे हे। चुना आयोग नै आखेया ऐ जे उन्नै एह कदम राज्य कैडर दे कुसै होर इ.आर.ओ गी बिजन कुसै दबाव जां डर दे अपनी जिम्मेवारी निभाने च सक्षम बनाने दे मकसद कन्नै पुट्टेया ऐ। आयोग नै 28 नवम्बर गी कोलकाता समेत राज्य दे 24 जिले लेई बंगाल कैडर दे 12 आई.ए.एस. अधिकारिये गी इ.आर.ओ. दे रुपै च नियुक्त कीता गया हा- पर राज्य सरकार नै इंदे चा त्रै अफसरें दा तबादला करी दिता हा।



US Prez –Iran

अमरीकी राष्ट्रपति डोनाल्ड ट्रम्प होरें परमाणु गल्लबात च गतिरोध गी लेइयै ईरान खिलाफ अपनी धमकिये गी दोहराया ऐ। ट्रम्प होरें चेतावनी दिती ऐ जे भविष्य च होने आहला कोई बी हमला पिच्छली कारवाइये थमां मता खतरनाक होग। राष्ट्रपति ट्रम्प होरें इक पोस्ट च तेहराम थमां परमाणु हथियारें दे खात्में लेई इक निरपक्ख ते न्यां-संगत समझौतें आस्तै फौरी गल्लबात दा आग्रह कीता ते आखेया जे समां घट्ट हुंदा जा रदा ऐ। ईरान पर हमले दा जिक्र करदे होई उनें आखेया जे जेकर ईरान सहयोग नैई करदा- तां अगला हमला मता खतरनाक होग।



T-20 Cricket

मर्दे दे टी-20 अंतराश्ट्रीय क्रिकेट दी मजूदा श्रृंखला दे चौथे मैच च भारत गी न्यूजीलैंड नै 50 रन्ज कन्ने हराई दिता ते उन्नै श्रृंखला च अपनी पैहली जित्त दर्ज कराई ऐ। विशाखापत्तनम च पैहले बल्लेबाजी करदे होई न्यूजीलैंड नै तय 20 ओवरें च 7 विकटें पर 215 रन्ज बनाए। Tim Seifert नै 36 गेदें च 62 ते डेवोन कॉनवे नै 23 गेदें च 44 रन्ज बनाए। परते च भारतीय टीम 18 ओवर ते 4 गेदें च 165 रन्ज गै बनाई सकी। शिवम दूबे नै 23 गेदें च 65 रन्ज ते रिंकू सिंह नै 30 गेदें च 39 रन्ज बनाए।

